

14 OGOS 2019 ( RABU )

### Peniaga pasar tani UTC korban 16 lembu

**Kuantan:** Lembaga Pemasaran Pertanian Persekutuan (Fama) Pahang menganjurkan Program Ibadah Korban Perdana membabitkan 16 lembu di kawasan tapak pasar tani Pusat Transformasi Bandar (UTC) di sini, kelmarin.

Program dengan kerjasama peniaga pasar tani, Ahli Parlimen Kuantan dan Majlis Perbandaran Kuantan (MPK) itu bermula jam 9 pagi dan berakhir lima jam kemudian.

Pengarah Fama Pahang, Rosli Aw Da berkata, program memasuki musim yang ke tujuh itu mendapat sambutan menggalakkan berbanding tahun lalu hanya membabitkan 14 lembu.

Menurutnya, antara lain tujuan program korban ini diadakan sebagai penghargaan peniaga pasar tani UTC kepada pelanggan apabila sebahagian daging

diagihkan kepada golongan terbabit.

Katanya, penyertaan peniaga pasar tani dalam program korban setiap tahun bertambah dan kesedaran terhadap suruhan agama sentiasa diberi keutamaan dalam apa juga aktiviti.

"Saya berharap program korban yang diadakan secara bersama dengan peniaga pasar tani UTC hari ini diikuti semua 36 pasar anjuran Fama seluruh negeri ini.

"Pendapatan hasil jualan peniaga menjadi lebih berkat dan semakin bertambah apabila aktiviti korban diadakan setiap tahun," katanya.

Beliau berkata, program diadakan secara gotong-royong itu mampu mengeratkan hubungan dalam kalangan peniaga pasar tani UTC dan kakitangan Fama yang terbabit.



ROSLI mengagihkan daging korban kepada peserta pada Program Ibadah Korban Perdana.